



ANGKOP NA PAMAGAT NG TALATA AT PAGGAMIT NG MALALAKING TITIK SA PAMAGAT

Pagkatapos ng modyul na ito ikaw ay inaasahang makapagbibigay na ng angkop na pamagat sa talata at makagagamit na nang wasto ng malalaking titik sa mahahalagang salita ng pamagat.



Pagbalik-aralan Mo

A. Isulat nang wasto ang salitang may salungguhit. Gumamit ng malalaking titik kung kinakailangan.

1. Ang Sinulog sa cebu city ay dinarayo ng mga turista at mananampalataya ng ating bansa.
2. Ginaganap ito tuwing ikatlong linggo ng buwan ng enero.
3. Kasabay ito ng kapistahan ng sto. niño.
4. Ayon sa mga taga-Cebu, ang sinulog ay isang uri ng ritwal na sayaw patungkol sa milagrosong imahe ng Sto. Niño.
5. ang sayaw raw na ito ang pagsabay sa “sulog” o “agos” ng Ilog Pahina sa Cebu.

B. Basahin ang talata. Isulat ang paksang diwa ng talata.

Isa sa mga katangiang maipagmamalaki nating mga Pilipino ay ang mabuti nating pagtanggap sa mga panauhin. Kapag ang isang pamilya ay may inaasahang panauhin, bawat isa ay abala sa paghahanda. Sila’y naglilinis at nag-aayos ng kabahayan. Nagluluto ang pamilya ng masarap na pagkain at naghahanda ng maraming prutas at inumin. Pinagkakaabalahan din nila kung ano ang maipauwing pasalubong ng panauhin.

Paksang diwa: _____



Ganito ba ang iyong sagot?

- A.
1. Cebu City
 2. Enero
 3. Sto. Niño
 4. Sinulog
 5. Ang
- B. Ang paksang diwa ng talata ay pagiging maasikaso sa mga panauhin



Pag-aralan Mo

A. Basahin ang talata.

Hindi na mabilang ang mga kababayan nating nanguna sa larangan ng pag-awit, pagpipinta at pag-ukit. Hinahangaan ng mga dayuhan ang mga produkto nating gawang kamay na tulad ng binurdahan at nililok. Tunay na ang mga Pilipino ay malikhain sa iba't ibang larangan.

Ano ang paksang diwa ng talata? _____

Ganito ba ang iyong sagot?

Ang mga Pilipino ay malikhain sa iba't ibang larangan.

Ano ang maaari mong ibigay na pamagat sa talata?

Ang pamagat ng talata ay: “Ang Pilipino : Likas na malikhain”

Magkatulad ba tayo ng pamagat? Nakatulong ba sa iyo ang paksang diwa ng talata sa pagbibigay ng angkop na pamagat?

Anong salita sa pamagat na “Ang Pilipinas : Likas na Malikhain”, ang sinimulan sa malaking titik?

Tama ka! Ang Pilipinas Likas Malikhain

Bakit sinimulan sa malalaking titik ang mga ito?

Oo, ang mga ito ay mahahalagang salita. Ang Ang ay simula ng pamagat.

Alin naman ang hindi sinimulan sa malaking titik? _____

Ang na ay hindi isinulat sa malaking titik dahil hindi ito mahalagang salita.



B. Narito ang isa pang talata. Basahin at isulat ang paksang pangungusap. Ito ay maaring matagpuan sa una, sa gitna, o sa hulihang pangungusap.

Isa sa mga tradisyon nating mga Pilipino ay ang kapistahan. Ang bawat lugar sa ating bansa ay may kapistahang ipinagdiriwang bilang pasasalamat sa kanilang patron.

Isa pang kilalang tradisyon natin ay ang bayanihan. Ang bayanihan ay ang pagtutulungan ng mga tao para sa isang gawain. May mga kababayan pa rin tayong sumusunod sa ganitong tradisyon lalo na sa mga lalawigan.

Ano ang paksang pangungusap? _____

Piliin ang angkop na pamagat

- a. Tradisyon ng mga Pilipino
- b. Kapistahan ng mga Pilipino
- c. Ang Bayanihan
- d. Mga Kapistahan sa lalawigan

Ang iyong sagot ba ay a? Tama ka!

Sinimulan bang lahat sa malalaking titik ang bawat salita sa pamagat?

Bakit hindi isinulat sa malalaking titik ang ng mga? _____

C. Basahin mo pa ang kasunod na talata.

Ang pamilyang Pilipino ay isang napakahalagang institusyon. Sa gitna ng maraming suliranin, dapat umiral ang pagmamahalan, pagkakaisa at pagtutulungan upang lalong tumibay ang pagsasamahan ng isa't isa. Ano mang problema ang dumating, kailangang mapanatiling buo at matatag ang pamilya. Bukod dito biyaya ng Diyos ang ating pamilya kaya't patuloy mong ingatan.

Piliin mo nga sa ibaba ang angkop sa pamagat ng talata?

- a. Ang Pamilyang Pilipino
- b. Ang Pamilya
- c. Ang Problema sa Pamilya
- d. Biyaya ng Diyos ang Pamilya

Tama ka! Ang pamilyang Pilipino ang angkop na pamagat ng talata.

Lahat ba ng salita sa pamagat ay sinimulan sa malalaking titik? _____

Kung ang iyong sagot ay oo, tama ka!



Isaisip Mo

Sa pagbibigay ng pamagat ng isang talata, alamin mo muna ang paksang-diwa o paksang pangungusap. Ang mga ito ay nagbibigay ng ideya sa pagpili ng pamagat. Ang pangunahing diwa ang pinakabuod ng mga pangyayari sa talata o kuwento. Ang paksang pangungusap ang pinagtutuunan ng mga detalye upang mabuo ang pangunahing diwa ng talata o kuwento.

Ginagamit ang malaking titik sa mahahalagang salita sa pamagat ng talata o kuwento. Ang unang salita sa pamagat ay sinimulan din sa malaking titik.



Pagsanayan Mo

A. Piliin ang angkop na pamagat sa mga pagpipilian na kasunod ng bawat talata.

1. Ang niyog (cocos nucifera) ay may karaniwang taas na 6 na metro o higit pa. Natatangi sa lahat ng puno ang niyog sapagkat bawat bahagi nito ay maaari ring sangkap sa paggawa ng sabon, shampoo, at iba pa.
 - a. ang niyog
 - b. Ang Niyog
 - c. Ang mga Gamit ng Niyog
 - d. ang mga gamit ng Niyog
2. Ang Kawanihan ng Rentas Internas (Bureau of Internal Revenue) ay ang sangay ng pamahalaan na namamahala sa pangongolekta ng buwis ng mga mamamayang may hanapbuhay. Bawat manggagawang Pilipino ay may tungkuling magbayad ng kaukulang buwis. Ang buwis na ibinabayad ang siyang ginagamit na pondo ng pamahalaan sa pagpapaganda at pagpapaunlad ng ating bansa.
 - a. Ang kawanihan ng Rentas Internas
 - b. Ang Kawanihan ng Rentas Internas
 - c. Ang kawanihan ng internas rentas
 - d. ang kawanihan ng internas rentas



B. Bigyan ng angkop na pamagat ang talata:

1. Si Lapulapu ang unang bayaning Pilipino. Nang matuklasan ni Magellan ang Pilipinas, gusto niyang kilalanin ng mga katutubo ang hari ng Espanya. Tinutulan ito ni Lapulapu at naganap ang digmaan sa pagitan ng mga Kastila at katutubo kung saan tinalo ni Lapulapu si Magellan at naging sanhi ng pagkasawi nito sa laban.
2. Si Melchora Aquino ay ipinanganak noong ika-6 ng Enero, 1821. Ang kanyang mga magulang ay sina Juan Aquino at Valentina Aquino. Noong kabataan niya ay madalas siyang maimbitahan sa kanilang parokya upang umawit lalung-lalo na sa mga araw ng pabasa. Hinirang rin siyang Reyna Elena ng Santakrusan. Kahit na walumpu't tatlong taon-gulang na si Tandang Sora, ito ay hindi naging hadlang sa kaniyang paglilingkod sa bayan. Lihim niyang tinulungan ang mga katipunerong maysakit at nagugutom.

Ganito ba ang iyong sagot sa pagsasanay A?

- A. 1. b
2. b

B. Maaari kang magkaroon ng sarili mong pamagat.
Ang ibibigay mong pamagat ay maaaring ganito.

1. Lapu-lapu, Bayaning Pilipino
2. Tandang Sora : Ina ng mga Katipunero



Subukin Mo

**Basahin mo ang talata sa ibaba.
Isulat ang sagot sa sagutang papel.**

1. Isa sa mga naging mahalagang personalidad sa People Power ay si Hilario G. Davide Jr. Siya ang punung-hukom ng Kataas-taasang Hukuman ng Pilipinas. Siya rin ang nagtalaga kay dating Pangalawang Pangulo Gloria Macapagal-Arroyo bilang bagong Pangulo ng bansa.

Nakamit rin niya ang Ramon Magsaysay Award para sa paglilingkod sa pamahalaan noong 2002, dahil sa kanyang mahusay na serbisyo.

Ano ang angkop na pamagat ng talata? Isulat mo ito nang wasto.



2. Napakahalaga ng bitamina A sa ating katawan. Ito ang tumutulong upang lalong luminaw ang ating mata. Ang kakulangan sa bitaminang ito ay maaaring magdulot ng paglabo ng paningin. Ang mga pagkain na mayaman sa bitamina A ay atay (manok o baka) itlog, gatas, keso, mga luntian at dilaw na gulay at prutas.

Ang angkop na pamagat ng talata ay _____

3. Ang kapistahan ng Our Lady of Peñafrancia ay ginaganap sa Naga City sa Bicol tuwing ikatlong Sabado ng buwan ng Setyembre. Pero ngayon ay ginaganap na rin ito sa buwan ng Mayo para sa mga hindi nakakadalo sa Setyembre. Bago ang mismong araw ng kapistahan, may siyam na araw na novena sa Birhen. Sa ikasiyam na araw, ibinabalik sa dambana ang imahen at idinadaan ito sa Ilog Naga sa paraang prusisyon ng mga bangka.

Ang angkop na pamagat ng talata ay _____

4. Ipinagmamalaki naman sa bahagi ng Rehiyon IV ang Puerto Galera na matatagpuan sa Oriental Mindoro. May 130 kilometro ang layo nito mula sa bahaging Timog ng Maynila. Dinarayo ng mga turista ang mapuputing buhangin sa mga beaches nito. Gayundin, napakaganda ng mga corals at iba pang laman-dagat na makikita sa kailaliman ng mga katubigan.

Ang angkop na pamagat ng talata ay _____

5. Si Pablo Planas ay isang dating tsuper at mekaniko. Siya ang nakaimbento ng Khaos Super Turbo Charger (KSTC) na isang tipid-gas na gamit para sa mga de-gasolinang sasakyan. Hindi siya nasilaw sa multi-milyong pisong alok ng bansang Amerika para lamang ibenta ang kanyang imbensyon. Ito ang nagpapatunay ng kanyang hangaring makatulong sa ating bayan.

Ang angkop na pamagat ng talata ay _____

Ganito ba ang iyong mga sagot?

1. Hilario G. Davide Jr, kilalang Punung-hukom
2. Bitamina A
3. Ang Kapistahan ng Our Lady
4. Sa Puerto Galera
5. Pablo Planas, isang Peñafrancia

Nakapagbigay ka ba ng angkop na pamagat?

Ipakita ang iyong sagot sa iyong guro.

Mabilis ang iyong pagkatuto. Binabati kita!